

Nov cusseglier federal – u nova cussegliera – per il «petit paradis»

Trais parlamentararis da trais partidas espriman preferentschas

DA CLAUDIA CADRUVI / ANR

■ **Heinz Brand** propona gist **Martin Schmid** u **Beat Walti**. **Silva Semadeni** pensa che la pld stuess exnum purtar ina candidatura dubla da dunnas. Era **Martin Candinas** è da l'avis che la pld cun ses dus sez en il cussegl federal ha plitost da procurar per ina nova dunna en la regenza. La Svizra saja in «petit paradis», scriva *Johann Schneider-Ammann* en sia brev da demissiu. Tgi daventa uss pia nov cusseglier federal en quest pitschen paradis? Immediat suenter la demissiu cumenzan las speculaziuns e ponderaziuns strategicas per ina successiu – quai dentant plitost davos las culissas. Ord resguard sin l'atgna partida u per motivs tactics na vegnan blers parlamentararis betg ora cun il marmugn e cun nums concrets. Auter cusseglier naziunal *Heinz Brand* (pps/GR). El di agrador ch'el pudessia s'imaginar fitg bain *Martin Schmid* sco candidat. Plinavant numna el il cusseglier naziunal *Beat Walti* da Turitg.

Tgi cupida durant sesidas?

«Pli gugent in Grischun ch'ina dunna», di Brand sin la dumonda sch'el pudess era s'imaginar *Karin Keller-Sutter*. En sa sez haja el spetgà ina demissiu dubla ensem cun cussegliera federala *Doris Leuthard*. Uss haja el in pau dubis sche *Leuthard* chalia insumma. El enconuschia *Schneider-Ammann* sco teamplayer ed el na possia betg s'imaginar che lez haja simplamain mo vuli esser pli spert cun dar enconuschent sco emprim sia demissiu.

Sin la dumonda sche *Schneider-Ammann* saja forsa stà sut memia grond squitsch medial pervi da rapports ch'el cupidia en sesidas, manegia Brand: «Jau na sai betg verifitgar quai.» El n'haja mai



Ils cussegliers naziunals grischuns **Heinz Brand** (pps), **Silva Semadeni** (ps) e **Martin Candinas** (pcd) (da san.) s'expriman davart la successiu da **Johann Schneider-Ammann** en il cussegl federal.

FOTOS MAD

vis che *Schneider-Ammann* avessia durmì en ina sesida da cumissiu. En sesidas da fracziun perencunter haja el gia observà politichers giuvens che sajan sa durmentads. Las notgs a Berna sajan magari curtas.»

En mintga cas giavischa Brand ch'il futur cussegl federal s'orienteschia clera main tenor l'economia, forsa anc dapli che *Schneider-Ammann*. «Il bloc burgais en il cussegl federal duai plitost daventar pli ferm che pli flavel.»

Pld duai metter si duas dunnas

«Igl è stà cler ch'el sa retira bain bod», di cussegliera naziunala *Silva Semadeni*. Ins haja gi l'impressiu che *Schneider-Ammann* resentia ina tscherta stancladad. Uss hajan ins temp fin la sessiu d'enviern da discutir la successiu. Suenter possia la pld partir en l'onn electoral cun in cusseglier federal frestg e viv. «I dovra



dunnas», punctuescha *Semadeni*. «Jau na less betg ina regenza cun mo ina suletta dunna.» *Karin Keller-Sutter* fiss per *Semadeni* tuttavia ina candidata valabla. Ella haja fatg bun networking durant ses onn presidial en la chombra pitschna. Duas giadas haja *Keller-Sutter* envidà en tuttas parlamentarias. «Per mai èsi impurtant che dunnas lavuran ensem ed èn preschentas en mintga gremi», di *Semadeni*. «Uss sto la pld preschentar duas dunnas sco candidatas.» Impurtant saja numnadamain era ch'il parlament haja la pussaivladad da tscherner.

Tge fa Doris Leuthard?

Sin la dumonda pertge che cussegliera federala *Doris Leuthard* n'haja betg gist coordinà sia demissiu cun *Schneider-Ammann* manegia *Martin Candinas*: «Jau na sai betg sch'ella n'ha betg coordinà. Fin uss na san ins insumma betg sch'i



dat propi ina midada tar ella.» Plinavant na saja quai gnanc decisiv, pertge sch'i avess propi da dar ina segunda vacanza avess l'elecziun gea lieu il medem di.

Era *Candinas* na po betg confermar che *Schneider-Ammann* haja cupidà durant las sesidas e na crai betg ch'el saja sa retratg pervia da tals rapports en gasettas. «Mintgin ha la libertad da decider sez cura ch'el vul sa retrair d'in tal uffizi pretensius», di il cusseglier naziunal *sur-silvan*. Nums concrets davart candidats potenzials na less *Candinas* betg numnar. El di sulet ch'il squitsch sin la pld saja fitg grond da metter almain ina dunna sin il ticket. La pld cun ses dus sez en il cussegl federal saja en mintga cas pli fitg en la responsabladad da tschentar si ina dunna che la pcd ch'haja be in sez e che haja cun *Doris Leuthard* gia demussa che la partida saja favuraivla visavi dunnas.

Martin Schmid sa nuspescha da dir insatge concret

CUN CUSS. DALS CHANTUNS MARTIN SCHMID HA DISCURRÌ CLAUDIA CADRUVI

Per il mument n'è quai nagin tema ed jau na vi prender nagina posiziun.

Da preschent pondereschan ins tgi che vegn en dumonda. *Karin Keller-Sutter*

ter è gia daditg en discussiu. *Vus avais segir era fatg ponderaziuns?*

■ **Sper Karin Keller-Sutter** croda trasor il num da **Martin Schmid** sco candidat valabel per la successiu da **Johann Schneider-Ammann**.

Tge schais Vus da la demissiu dal cusseglier federal da Vossa partida?

Martin Schmid: *Johann Schneider-Ammann* po demussar ina buna bilantscha. Sco cusseglier federal è el stà fitg ferm ed er en ils contacts persunals ha el gi qualitats excellentas. El sa retira a moda degna ed en il dretg mument. El fa plaz per roschadas en il cussegl federal. Jau chapesch era sia situaziun persunala.

Ch'el demissiunescha uss anc avant Doris Leuthard, ha quai da far cun il suqitsch medial perquai ch'el sa durmentata magari durant sesidas?

Jau chatt che quai è in fauss maletg ch'ins ha purtà qua en las medias. Jau al ves auter – er en las sesidas da cumissiu. Jau na sai betg m'imaginar ch'el dat sia demissiu sin fundament d'in squitsch medial. Igl è segir stà ina decisiun persunala ch'el ha prendì mo per sai.

Ponderais Vus ina candidatura sco successur da Schneider-Ammann?



Martin Schmid, cusseglier dals chantuns.

MAD

Igl è segir uschia che *Karin Keller-Sutter* è ina favorita. Ma per mai persunalmain è la situaziun nova ed jau hai en senn da prender posiziun cun temp e peda.

L'uffizi è fitg attractiv, ins metta en moviment insatge ed ha influenza. Quai è captivant?

Igl è in uffizi executiv che tutga tar la construcziun da noss stadi, exact sco la legislativa e la giudicativa. Gea, i sa tratta dad in'otra rolla. Ma i ma plascha fitg bain en il cussegl dals chantuns. L'onn proxim ma mett jau fitg gugent anc ina giada a disposiziun sco rappresentant dal Grischun en la chombra pitschna, uschia ch'jau pos cuntinuar qua mia lavur.

Tar Vossas ponderaziuns sche Vus vulais candidar per il cussegl federal u betg – gioghi er ina rolla ch'il Grischun ha cun Eveline Widmer-Schlumpf dacurt gist gi insatgi en il cussegl federal?

Na, il davos èsi il parlament che fa la tscherna e forsa datti uss lura anc ulteriuras midadas, gist en connex cun speculaziuns davart ina demissiu da *Doris Leuthard*.